



MARKAS ANGKATAN TENTERA MALAYSIA
BAHAGIAN HAL EHWAL AWAM-J7

Wisma Pertahanan
Jalan Padang Tembak
50634 KUALA LUMPUR
Tel: 03-20716425/6424
Laman Web: www.mafhq.mil.my

KENYATAAN MEDIA

KUALA LUMPUR
28 JUN 2021

(Dikeluarkan pada jam 11.30 pagii)

ATM TERUS KOMITED MEMBANTU NEGARA MENANGANI PENULARAN PANDEMIK COVID-19 DENGAN PENUBUHAN HOSPITAL MEDAN ATM KE-6 DI WILAYAH PERSEKUTUAN LABUAN

Panglima Angkatan Tentera, Jeneral Tan Sri Dato' Sri Hj. Affendi bin Buang TUDM menyatakan ATM akan terus komited membantu negara dalam menangani penularan wabak pandemik COVID-19 demi kesejahteraan rakyat Malaysia. Terkini, berdasarkan situasi pandemik COVID-19 yang melanda negara, ATM sekali lagi meneruskan khidmat tugas sekundernya dalam menyediakan Hospital Medan ATM Ke-6 di Wilayah Persekutuan Labuan setelah menubuhkan Hospital Medan Ke-5 di Hospital Tuanku Sultanah Aminah Johor Bahru (HSAJB).

Kerjasama sepenuhnya diberikan oleh Kementerian Kesihatan Malaysia (KKM), Agensi Pengurusan Bencana Negara (NADMA), Jabatan Kesihatan WP Labuan, Perbadanan Labuan, Jabatan Kerja Raya (JKR) Labuan serta bantuan khas daripada Persatuan Bantuan Perubatan Malaysia (Malaysian Medical Relief Society-MERCY Malaysia) bagi melaksanakan penubuhan hospital medan berkenaan yang ditempatkan di Dewan Perbandaran Labuan bagi merawat pesakit COVID-19 untuk kategori 3, 4 dan 5.

Hospital Medan ATM Labuan ini telah memulakan operasinya pada Ahad, 27 Jun 21 setelah selesai semua ujian operasi dan keselamatan. Aturgerak anggota dan aset ATM serta MERCY Malaysia bagi kerja-kerja pemasangan telah dilaksanakan sejak 22 Jun 21 lalu. Turut dilakukan adalah kerja-kerja sivil, mekanikal dan elektrik oleh JKR Labuan yang bermula pada 24 Jun 21.

Pada 26 Jun 21, telah dilaksanakan sesi *dry run* dan latihan kebakaran bagi semua petugas melibatkan pegawai dan anggota Perkhidmatan Kesihatan Angkatan Tentera (PKAT), Hospital Labuan, Jabatan Kesihatan WP Labuan, MERCY Malaysia, JKR WP Labuan, Perbadanan Labuan, Polis Diraja Malaysia (PDRM), Angkatan Pertahanan Awam Malaysia (APM – Labuan), Jabatan Bomba dan Penyelamat Malaysia (JBPM Labuan) dan beberapa pegawai serta anggota dari Pangkalan Udara TUDM Labuan.

Berdasarkan keupayaan semasa, ATM melalui PKAT telah menggerakkan beberapa peralatan hospital medan termasuk Kompleks Khemah Drash serta peralatan-peralatan perubatan dan bukan perubatan yang lain. Tidak ketinggalan turut digerakkan ialah ahli Tim Teknikal Hospital Medan di samping Pakar Bius, Pakar Kecemasan, Pegawai Perubatan dan Anggota Perubatan Kor Kesihatan Diraja.

Melalui bantuan MERCY Malaysia pula, Badan Bukan Kerajaan berkenaan menyediakan sebahagian peralatan perubatan ICU yang di perlukan, unit khemah *inflatable* jenis ROFI, unit khemah utilis TM 36, 5 unit aircond 5.0 HP, tenaga sukarelawan kesihatan dan aset-aset logistik am. Mereka juga terlibat secara langsung di dalam mengendalikan latihan klinikal kepada petugas-petugas ATM dan KKM.

Komitmen ATM ini serta kerjasama dengan pelbagai agensi lain akan diteruskan bagi memastikan kesihatan dan kesejahteraan rakyat Malaysia sentiasa dilindungi, seterusnya membantu Negara dalam mengekang penularan wabak COVID-19 ini.

-TAMAT-

“KEDAULATAN NEGARA TANGGUNGJAWAB BERSAMA”